

Cuerpo Policial Aruba, FADA y Fundacion Zinnia a lansa campaña

Ata'mi ki... ami ta bo Amigo Didi

ORANJESTAD – Despues di algun luna di deliberacion, FADA, Fundacion Zinnia y Cuerpo Policial Aruba, mirando cu tur ta trahando pa e mesun meta y cu comunicacion di informacion y prevencion ta un parti grandi di esaki, a dicidi di aumenta conscientisacion bou di nos pueblo relaciona cu stuurmento bou influencia di alcohol.

Esaki ta informacion for di un relato di minister di Husticia:

Hunto cu FADA y Fundacion Zinnia, Cuerpo Policial ta lansa e producto aki cu e intencion di conscientisa e comunidad riba e riesgonan di core auto bao di influencia di alcohol.

“Esaki lo ta e tema di e campaña aki cu ta conseha pa laga un otro hende stuur si bo ta bao di influencia di alcohol”, asina Lito Laclé, encarga cu e departamento di informacion, comunicacion y prevencion di Cuerpo Policial Aruba, ta bisa.

Siguiendo riba e topico, Juendell Sprock, Director di FADA ta splica cu e campaña #Ami-



goDidi ta mescos cu e campaña na Hulanda 'Bob' unda cu e personanan cu ta bay consumi alcohol semper mester tin nan amigo Didi pa hiba nan. “Amigo Didi ta un persona cu no ta bebe y ta esun cu ta bay stuur e vehiculo. E por ta un auto, brommer, bicicleta, skateboard, lo ke sea, esun cu ta participa den trafico no por ta bao influencia di alcohol.”

E campaña aki lo ta tur caminda, cuminsando cu un spot na television, un jingle como tambe banners na puntonan strategico. FADA tambe lo ta riba caya hunto cu Polis pa esun-



nan cu no a consumi alcohol haya un sticker riba nan auto y esunnan cu no ta cumpli tambe tin un plan pa nan. Michella Croes-Matos, secretaria di Fundacion Zinnia, a habri e tema splicando cu e ta kere cu hopi hende sa cu e fundacion aki a lanta despues cu nan a perde nan yiu mulhe y e fundacion a lanta a base di inspiracion di kico bon por a saca for di un situacion hopi tristo y malo... “asina nos a bin cu Fundacion Zinnia”. El a sigui bisa nan kier a cuminsa conscientisa manera na Hulanda unda cu nan tin BOB y kier a trece un imagen asina na Aruba y a bin cu e nomber Didi, un nomber crioyo. Siguiendo den deliberacionnan a amplia riba e idea aki y awe nos tin #AmigoDidi.

“Nos no kier stop hende di bebe. Nos kier conscientisa nan cu ora nan sali nan por bebe pero mester tin un hende sobrio pa conduci”, asina Michella Croes-Matos ta enfatisa. Ta pidi tur hende pa ta mas consciente e fin di aña aki. Corda ora sali di fiesta, cu tin famia wardando na cas. Evita causa tristesa den un temporada di celebracion y alegria.

